

Martin Luther King III:

"Mester solamente di un par di bon homber y muhe pa haci e cambio"

ORANJESTAD - Martin Luther King III a tene un discurso emocionante durante e ceremonia di desvelo di estatua di Anne Frank. E tabata emocionado pa varios motibo, pero un di nan ta sigur despues di a tende con Rabbi Soetendorp a conta na un manera simpatico y amabel con el a yega di topa cu su tata y con tanto el a aprecia e encuentro ey, dos luna prome cu Martin Luther King jr. a wordo asesina.

Den su discurso el a dirigi su mes na tur presente y specialmente na e hobennan, pasobra nacionnan ta wordo husga con nan ta trata nan recursonan mas precioso y e muchanan sigur ta e recursonan mas precioso di un nacion. King a bisa cu e y su señora Andrea ta masha contento di por ta na Aruba pa observa e desvelo di e estatua di Anne Frank. Mundo masha poco ta para keto pa muestra con nos mester crea un miho mundo pa tur e yiunan di Dios. "Mester solamente di un par di bon homber y muhe pa haci e cambio. No semper ta e masa, pero ta e poconan aki cu a cambia mundo den un forma cu no por wordo midi". King a conta e audiencia grandicueberdad e tabata un mucha chikito ainda ora su tata a wordo mata. Un aña despues di e morto di su tata, un omo di dje a hoga den un forma misterioso. Cuatro aña despues su wela a wordo tira mata, sinta den misa tocando orgel. Martin Luther King III a bisa di ta masha agradecido pa e mensahe cu su mama,

su omonan y welo a siñe. Cu ta e mensahe di amor y pordon. Pasobra cu semper ta facil pa tin sentimentonan di amargura. Lo tabata facil pa sinti odio contra hendenan blanco, pasobra ta un homber blanco a mata su tata. Of pa tin odio contra hendenan di color, pasobra ta un homber di color a mata su wela. E ta bisa cu ta pesey mes e ta contento cu e no tin e sentimentonan ey dor di e educacion cu el a haya. Un educacion cu a siñe pa rechasa actonnan di maldad, pero keda stima e hende. "Nos mester siña pa tin e capacidad pa pordona otronan y asina nos mundo lo bira un miho lugar pa biba". King a splica cu cada dia nos ta progresa den nos intento pa haci di e mundo aki un miho lugar pa biba. Cu pasonan chikito por ta, pero cada dia nos ta yega un poco mas cerca di nos mision. El caba su discurso contando un storia cortico. Con e y su rumannan a bishita hunto cu nan mama e scol secundario cu su mama Coretta Scott King a atende y eynan el a mira un estatua cu tabatin un inscripcion cu a haci un impacto grandi riba su bida. E inscripcion ta bisa "Sinti berguensa te dia cu bo gana un victoria pa humanidad". King a bisa cu podise tin hende cu por pensa cu e mensahe aki ta grandioso, pero no ta algo cu por cumpli cune sin mas. Pero, loke e mensahe aki en realidad kier men ta pa trata haci un contribucion ora y unda bo por.

Nos por haci esaki dor di yuda den nos bisindario. Nos por haci esaki den nos comunidad of den nos ciudadnan, den estadonan y por ta den nos mundo.

"Mester solamente di un par di bon homber y muhe pa haci e cambio."

Mas importante di e mensahe aki ta cu mester sinti berguensa te ora bo a haci algo aunke ta chikito pa haci e mundo riba cua nos tur ta biba un poco miho cu e tabata prome cu bo a yega". □



Martin Luther King III